



Datë: 05.01.2026
Numër Protokolli: 676/2026

A.nr.1770/2025

Këshilli i Pavarur Mbikëqyrës për Shërbimin Civil të Kosovës – Kolegji për Shqyrtimin dhe Vendosjen e Ankesave në përbërje nga: Ardita Haxhnikaj Demi, kryetare, Ardita Haxhnikaj Demi dhe Malsore Gashi Bajraktari, anëtarë, me Merlinda Ramaj në cilësinë e procesmbajtëses, në procedurë sipas ankesës A.nr.1770/2025, të datës 08.10.2025, të parashtruar nga ankuesi A.D, kundër organit të punësimit: Komuna e Lipjanit, në çështjen juridike “*Kërkesë nga marrëdhënia e punës*”, duke vepruar në pajtim me nenin 6, paragrafin 1, nën paragrafin 1.1 dhe nenin 18, paragrafin 1, nën paragrafin 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës si dhe në mbështetje të Rregullores Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, më datë 05.01.2026, mori këtë:

V E N D I M

Hedhet poshtë si e parakohshme ankesa me numër A.nr.1770/2025, të datës 08.10.2025 të parashtruar nga ankuesi A.D.

A r s y e t i m

Nëpunësi civil, A.D (në tekstin e mëtejme referuar: ankuesi), më datë 08.10.2025, ka parashtruar ankesë në Këshillin e Pavarur Mbikëqyrës për Shërbimin Civil të Kosovës, kundër Vendimit më numër protokolli 01-120/04-54681, të datës 23.09.2025, të Kryetarit të Komunës së Lipjanit.

Kolegji i Këshillit nga analizimi i shkresave të lëndës si dhe referuar pretendimeve ankimore të parashtruar nga ankuesi, ka gjetur se ankesa **është e parakohshme**, sepse:

Nga administrimi i provave të lëndës rezulton se ankuesi sipas Aktit të Emërimit të datës 06.12.2019, mbanë pozitën e Zyrtarit për Kadastër në Drejtorinë për Gjeodezi dhe Kadastër të Komunës së Lipjanit. I njëjti më datë më datë 28.04.2025, ka parashtruar ankesë në Këshillin e Pavarur Mbikëqyrës për Shërbimin Civil të Kosovës, më pretendimin që ti mundësohet emërtimi i pozitës së punës siç është paraparë në tabelën e Katalogut të Vendeve të Punës si Zyrtar i Lartë për Çështje Juridike Kadastrale, klasa Profesional 1. Këshilli i Pavarur Mbikëqyrës për Shërbimin Civil të Kosovës me Vendimin A.nr.742/2025, të datës 28.08.2025, ka aprovuar ankesën e ankuesit si të bazuar duke detyruar organin e punësimit në këtë rast Komunën e Lipjanit, që brenda afatit prej 15 ditësh nga dita e pranimit të këtij vendimi, të rishqyrtoj kërkesën e datës 19.02.2025 të parashtruar nga ankuesi dhe të nxjerr akt

administrativ në pajtueshmëri me dispozitat ligjore në fuqi. Ndërsa, në zbatim të Vendimit të Këshillit, Kryetari i Komunës së Lipjanit më Vendimin më numër protokolli 01-120/04-54681, të datës 23.09.2025, ka shqyrtuar kërkesën e ankuesit për klasifikim të pozitës së tij me arsyetimin se :... *më Vendimin Nr.01-020-04-39381, të datës 30.07.2025, ka formuar Komisionin për Ristrukturim dhe Sistematizim të Vendeve të Punës të Administratës Komunale të Lipjanit. Ky Komision do të shqyrtoj kërkesën tuaj për planifikimin e pozitës si Zyrtar i Lartë për Çështje Pronësore*”.

Ankuesi serish më datë 08.10.2025 ka parashtruar ankesë në KPMSHCK, duke pretenduar për mos zbatimin e Vendimit A.nr.742/2025, të datës 28.08.2025, të Këshillit të Pavarur Mbikëqyrës për Shërbimin Civil të Kosovës. Kërkon që Këshill ta detyroj Komunën e Lipjanit për rregullimin e pozitës së tij të punës.

Lidhur me shqyrtimin e pretendimeve ankimore të ankuesit, Kolegji i Këshillit analizoi dispozitat e Ligjit Nr. 08/L-196 për Pagat në Sektorin Publik, me theks të veçantë nenin 2 paragrafi 1 dhe 2 si dhe nenin 14 paragrafi 3 ku parashihet se: ” **Neni 2:** 1. Ky ligj zbatohet për të punësuarat/it në sektorin publik pagat e të cilave/ëve financohen nga dhe përmes buxhetit të shtetit, 2. Rregullat dhe kushtet për përcaktimin e pagës të punësuarave/ëve në sektorin publik janë ekskluzivisht rregullim i këtij ligji dhe mund të rregullohen edhe me akte të tjera nënligjore, vetëm kur parashihet shprehimisht nga ky ligj”, **Neni 14:** 3. Klasifikimi i një pozite të caktuar të shërbimit civil, bëhet në bazë të rregullave të vlerësimit dhe klasifikimit të pozitave të punës, sipas dispozitave për klasifikimin e pozitave të shërbimit civil, në pajtim me legjislacionin në fuqi për zyrtarët publik...”, referuar këtij përcaktimi ligjor, Kolegji i Këshillit konstatoi se paga bazë e nëpunësit civil përcaktohet sipas klasës së pagës, përkatësisht koeficientit, të cilit i përket pozita e punës, e klasifikuar në shtojcën Nr.10 të Ligjit Nr.08/L-196 për Pagat në Sektorin Publik, ndërsa, klasifikimi i një pozite të caktuar të shërbimit civil, bëhet në pajtim me legjislacionin në fuqi për zyrtarët publik dhe rregulloren e aplikueshme për klasifikimin e vendeve të punës në Shërbimin Civil.

Në fakt, Kolegji i Këshillit nga shqyrtimi i provave të lëndës ka gjetur se Kryetari i Komunës së Lipjanit më Vendimin Nr.01-020-04-39381, të datës 30.07.2025, ka themeluar Komision për ristrukturim dhe sitetizimin e vendeve të punës në administratën e Komunës së Lipjanit, i cili Komision ka vazhduar punën duke hartuar edhe Raportin për Ristrukturim me datë 24.11.2025. Andaj, mbi këtë rrethanë faktike, konkretisht duke qenë se organi përkatës i punësimit është në fazën e përgatitjes së rregullores për organizim të brendshëm dhe klasifikim të pozitave të punës për nëpunësit e saj publikë, akt nënligjor që bartë edhe obligime tjera buxhetore, atëherë, Kolegji i Këshillit vlerëson se ankesa e parashtruar nga ankuesi për klasifikimin e pozitës së tij sipas kategorisë profesionale 1, është e parakohshme, dhe si e tillë, në këtë fazë nuk i plotëson kushtet ligjore për trajtim meritore.

Në kuptim të parimit të ligjshmërisë dhe pritshmërisë legjitime si parime bazë në punën e institucioneve publike, Kolegji i Këshillit rikujton organin punëdhënës në këtë rast Komunën e Lipjanit që bazuar në nenin 34 të Rregullores (QRK) Nr.06/2024 për Klasifikimin e Vendeve të Punës në Shërbimin Civil, e aplikueshme nga data 28.02.2024, si dhe në mbështetje të Vendimit Nr.08/226, të datës 23.10.2024, të Qeverisë së Republikës së Kosovës për miratimin e Katalogut të Vendeve të Punës për Shërbimin Civil, **ka qenë e obliguar që të përfundojë klasifikimin e vendeve të punës në përputhje me Rregulloren Nr.**

06/2024 për Klasifikimin e Vendeve të Punës dhe këtë katalog. Andaj, çdo shmangie nga ky detyrim ligjor përbën mos veprim të organit publik dhe njëkohësisht bartë pasoja materiale për zyrtarët publikë në kuptim të klasifikimit të pozitës dhe pagës së tyre, kështu që, Komuna e Lipjanit duhet të përfundoj sa më shpejt rregulloren për organizim të brendshëm dhe sistematizimin vendeve të punës, në atë mënyrë që nëpunësit të realizojnë pagën në pajtim me legjislacionin aplikueshëm.

Thënë si më lartë, e në mbështetje të nenit 18, paragrafi 1, nën paragrafi 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, u vendos si në dispozitiv të këtij vendimi.

Këshillë juridike: Ky vendim hyn në fuqi në ditën e nënshkrimit nga Kryetarja e Kolegjit. Pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS

Lënda: A.nr.1770/2025

Merlinda Ramaj

Procesmbajtëse

Ardita Haxhnikaj DEMI

Kryetare e Kolegjit

Vendimi i dërgohet:

- Ankuesit, A.D;
- Komunës së Lipjanit: Kryetarit dhe Udhëheqësit të Njesisë së Burimeve Njerëzore;
- Arkivit të KPMSHCK-së.